



*Rabu, 17 Januari 2024*  
**Ogen : 2 Raja-raja 4:16-17**



**Mupus Anak Dilaki**



**D**iberu Sunem, kalak bayak dingen metemue. Mehuli jelmana dingen la mekarus. I bas kerina perbahanenna ncidahkan biak si pantas man usihen. Ras perbulangenna ersada arih guna ngelai nandangi temue terkusus man serayan Tuhan. Melikas tuhu-tuhu geluhna itatap jelma si enterem. Kepeken i bas kerina kinilitenna (kinibayakenna) rikut ras kiniersadan jabuna, lit sada si jadi perbebenna. Perbeben e labo icidah-cidahkenna, tapi ieteh jelma si enterem, termasuk Gehasi suruh-suruhan nabi Elisa. Nggo ndekah erjabu tapi lalap langa lit pupusna. Perbeben e la erbahanca ia surut i bas ngelakoken si mehuli, sabap perbeben e la banci ngolangi si mehuli si man lakonken. Tetap erbahan mehuli aminna pe langa kuh si bas ia. Sada paksa ituriken Elisa me kerna kai si nandangi jadi i bas geluhna, e me i bas tahun si reh iangkipna me sekalak anak dilaki (mupus). Ranan enda erbahanca sengget diberu Sunem janah nina "ola bage Tuan, ola kam erguak man bangku sabap kam sekalak suruh-suruhan Tuhan." Arah kata sinibelasken e ncidahkan perukurena. Mupus anak dilaki si labo tuhu, labo banci. Melala alasen si niakap tuhu i bas pusuh janah berita sisehken nabi Elisa e labo banci tersehi. Diberu Sunem enda lanai bo ngarapken kal anak dilaki erkiteken erbage-bage alasen. Labo ngatakenca la ia perlu anak e, anak e enggo ndekah timaina, iusahakenna, tapi seh bas paksa e langga seh. Peltep pengarapenna guna si e. Si labo banci jadi niakap, kepeken jadi i bas Tuhan. Adi siterusken ngoge turi-turin diberu Sunem enda maka tuhu me sikataken Elisa, ialokenna me anak dilaki e, ialokennna kesangapen dingen ikuhi Dibata me geluhna. Ieteh Dibata nge kai siniperluken i bas geluhta, ipakena enterem jelma guna nehisa. Tetap erbahan si mehuli man ise pe, sabap cara Dibata nehken padanNa labo terukuri. Tetap cidahkanlah kinitekennta arah kai silakoken kita teptep warina.

☞ *"Pemere Dibata si mehulina i bas paksaNa"*

